

# An buiséad agus an timpeallacht

## Ceist 1

Beidh tú ag féachaint ar ball ar thuairisc faoi bhuiséad 2021. An dtuigeann tú na focail seo a bheidh sa mhír?

cáin charbóin	breosla	
dé-ocsaíd charbóin	cúrsaí comhshaoil	peitreal & díosal
geilleagar	iarfheistiú	
faoi scáth	cúrsaí aeráide	gan amhras



## Ceist 2

Féach ar an mír den chéad uair agus aimsigh na focail thuas ó cheist 1 inti. Pléigh éirim na tuairisce leis an duine in aice leat.

## Ceist 3

Anois féach ar an mír arís agus freagair na ceisteanna seo a leanas.

1. Cathain a thiocfaidh ardú ar cháin charbóin ar bhreosla gluaisteáin?
2. Cathain a thiocfaidh ardú cánach ar bhreoslaí eile?
3. Cé mhéad euro cánach a bheidh ar gach tonna dé-ocsaíde carbóin sa bhliain?
4. Cén aidhm atá ag an rialtas don bhliain 2050?
5. Cad a dhéanfar leis an €100 milliún a bhaileofar ón gcáin charbóin?
6. Cad a bhí le rá ag Micheál Ó Cinnéide?

## Ceist 4

‘...i lár chathair **Bhaile Átha Cliath...**’

An féidir leat Gaeilge a chur ar na háiteanna seo thíos? Is féidir leat do chuid freagraí a sheiceáil ar [www.logainm.ie](http://www.logainm.ie) ansin.

- Belfast
- Roscommon
- Kildare
- Achill Island
- Dundalk

- Mallow
- Letterkenny

**Ceist 5** ‘...comhshaol...’

Is féidir focail áirithe a cheangal le chéile sa Ghaeilge chun comhfhocal a dhéanamh. Ach, de ghnáth, bíonn ‘gliú’ ag teastáil chun iad a cheangal le chéile – an ‘gliú’ sin ná an séimhiú. Féach na samplaí seo:

seanfhear  
comhfhocal

- A. Bí ag obair leis an duine in aice leat. Déanaigí comhfhocail as na focail seo a leanas agus abraigí cad is brí leis na comhfhocail:

ceard + cumann: \_\_\_\_\_  
ard + caighdeán: \_\_\_\_\_  
ceann + ceathrú: \_\_\_\_\_  
óg + bean: \_\_\_\_\_  
for + mór: \_\_\_\_\_

- B. I gcásanna áirithe ní féidir an séimhiú a úsáid mar ‘ghliú’ faoi mar a fheictear sna samplaí thíos.

saineolaí

ceanteideal  
seanduine

An bhfuil aon tuairim agat cén fáth nach féidir an séimhiú a úsáid sna cásanna sin?

**Ceist 6** Bí ag obair leis na daoine eile i do ghrúpa agus pléigí an cheist seo:

Conas is féidir linn an méid plaistigh a úsáidimid a ísliú?

Scríobhaigí amach liosta!

## Treoracha agus Freagraí

### Ceist 1

carbon tax	<i>cáin charbóin</i>
fuel	<i>breosla</i>
carbon dioxide	<i>dé-ocsaíd charbóin</i>
environmental affairs	<i>cúrsaí comhshaoil</i>
petrol and diesel	<i>peitreal agus díosal</i>
economy	<i>geilleagar</i>
retrofit	<i>iarfheistiú</i>
under a shadow	<i>faoi scáth</i>
climate issues	<i>cúrsaí aeráide</i>
undoubtedly, indeed	<i>gan amhras</i>

### Ceist 2

Féach an script.

### Ceist 3

Féach an script.

### Ceist 4

Belfast – Béal Feirste  
Roscommon – Ros Comáin  
Kildare – Cill Dara  
Achill Island – Oileán Acla (Acaill)  
Dundalk – Dún Dealgan  
Mallow – Mala  
Letterkenny – Leitir Ceanainn

### Ceist 5

A.

ceard + cumann:	ceardchumann (trade union)
ard + caighdeán:	ardchaighdeán (quality)
ceann + ceathrú:	ceanncheathrú (headquarters)
óg + bean:	ógbhean (young woman)
for + mór:	formhór (majority)

B.

Ní féidir séimhiú a chur ar ghuta sa chéad shampla. Ní féidir séimhiú a chur sna samplaí eile mar go bhfuil péire de na litreacha 'd, n, t, l, s' ag teacht le chéile. An riail ghramadaí atá i gceist ná nach féidir séimhiú a chur ar an dara focal sa chomhfocal sa chás go bhfuil dhá litir ón ngrúpa sin díreach in aice lena chéile.

### Ceist 6

Roinn an rang i ngrúpaí agus tabhair tamall maith cainte do na foghlaimoirí an liosta a dhéanamh. Bíodh plé agat leis an rang ar fad agus cuir obair gach grúpa i gcodarsnacht a chéile.

### **Siún Nic Gearailt**

Anois, tá ardú le teacht ar cháin charbóin ó mheán oíche anocht i gcás breosla gluaisteáin agus ón gcéad lá de Bhealtaine i gcás breoslaí eile. Gearrfaidh cáin €33.50 in aghaidh gach tonna dé-ocsaíd charbóin<sup>1</sup> as seo amach. Tá a thuilleadh faoi seo ag Caoimhe Ní Laighin atá i lár chathair Bhaile Átha Cliath.

### **Caoimhe Ní Laighin**

Is dócha gurb é an ceannteideal sa mbuiséad seo ó thaobh cúrsaí comhshaoil de ná an t-ardú ar cháin charbóin. Tá ardú €7.50 go €33.50 le teacht air sin in aghaidh gach tonna dé-ocsaíd charbóin. Tíocfaidh an t-ardú sin i bhfeidhm láithreach ar pheitreal agus ar dhíosal anocht agus tíocfaidh sé i bhfeidhm ar bhreoslaí eile i mí na Bealtaine. Tá ardú €7.50 le teacht ar an gcáin sin gach uile bhliain go dtí go mbeidh costas €100 in aghaidh gach tonna air. Ar ndóigh tá sé mar aidhm ag an rialtas an carbón a bhrú go hiomlán amach as an ngeilleagar faoin mbliain 2050.

As an gcáin charbóin sa mbreis sin a bhaileofar sa mbliain amach romhainn, cuirfear €100 milliún sa mbreis ar fáil chun iarfheistiú a dhéanamh ar thithe daoine agus chomh maith leis sin, tá athruithe le déanamh ar VRT<sup>2</sup> chun roghanna níos sláintiúla don timpeallacht a spreagadh.

Chuir mé ceist ar shaineolaí amháin níos túisce inniu, ar cheap sé gur drochbhuiséad nó buiséad maith a bhí ann i mbliana, ó thaobh cúrsaí comhshaoil de.

### **Micheál Ó Cinnéide, Iar-Stiúrthóir na Gníomhaireachta um Chaomhnú Comhshaoil**

Tá sé deacair a rá mar gan amhras táimid faoi scáth agus faoi scamall Covid. Agus, ar shlí tá an timpeallacht brúite, mar a déarfá, as an mbealach. Sin é an rud atá tarlaithe. Bhí sé daichead nóiméad inniu sular thosaigh Paschal Donohoe ag caint ar chúrsaí aeráide nó timpeallachta. So, tuigimid é sin. Ach, nuair a imeoidh Covid, tíocfaidh na ceistanna sin thar n-ais arís. So, ní drochbhuiséad é, ó mo thaobh féin de, mar tá rudaí déanta, ach gan amhras tá scéalta i bhfad níos mó againn inniu.

---

<sup>1</sup> gach tonna dé-ocsaíde carbóin de réir an Chaighdeáin

<sup>2</sup> Vehicle Registration Tax, Cáin Cláraithe Feithiclí as Gaeilge